

錢海岳 撰

# 南明史

第五冊

中華書局

三三三

南明史

一

10

錢海岳撰

# 南明史

第五册 列傳  
卷二十五至卷三十五

中華書局

# 南明史卷二十五

## 列傳第一

無錫錢海岳撰

### 后妃

安宗孝哲黃皇后 黃奇瑞 子調鼎等 安宗孝義李皇后 童妃 金妃 陳妃等 宮嬪某 張宮

人等 紹宗孝毅曾皇后 宮嬪某 曾文彦 昭宗孝剛王皇后 寶妃 宮嬪某 劉楊二貴人

王畧 王維恭等 監國魯王烈妃 監國魯王周義妃 監國魯王張妃 張國俊 毛有倫

監國魯王陳貞妃 郡主某等

安宗孝哲黃皇后，雒陽人。都指揮僉事奇瑞女。安宗爲德昌王，冊爲王妃，早世。上即位，追尊諡曰孝哲懿莊溫正仁靖儀天昭聖皇后。魯王監國，上諡曰安皇后；昭宗即位，

加上尊諡曰簡皇后。

黃奇瑞，字畫一，恩貢。李自成兵迫，勸福王常洵發粟振民力守，不用。雒陽破，不屈死，贈雒中伯。

子調鼎，字鹽梅，諸生。雒陽破，從上匿安國寺，夜奪門出，追亟，倉皇伏人家豕牢中得免。上肥碩，不能行，背負北走苗家溝。兵且及，調鼎力憊不支，正旁皇間，聞馬嘶聲，趨視之，則上素所乘也，遂疾驅渡河，依鄭王翊鐸二年。從扈南京，授後軍都督同知總兵，遷左都督，封保安伯。馬阮亂政，屢諫不聽。南京亡，依祁理孫紹興。清徵固辭。後入北京，奉上梓宮合葬雒陽后陵，并迎鄒太后於家，定省肅衣冠，崩，奉葬熙陵。嘆曰：「所爲隱忍偷生，不即從地下者，徒以是耳。」遂杜門講學。有言及故事者，輒於邑不語。年逾九十乃卒。九鼎，上封雒中伯，疏言皇親滿街作橫，請查核。南京亡，降於清。金鼎，授都督同知。

安宗孝義李皇后，雒陽人。安宗爲世子，冊爲繼妃。雒陽破，自經。上即位，追尊諡曰孝義端仁肅明貞潔熙天詒聖皇后。

時有童妃者，偃師人，上襲福王後所納，或云司寢。雒陽破，從鄒太后避兵尉氏，展轉逆旅間。無何，上亦至，就邸中相依，生一子。及上南下，與太后散去，不相顧。上遣官齎

詔迎太后；陳潛夫、吳爾壘奏妃故在，弗召。妃乃詣越其杰自陳。劉良佐命妻迎，叩之。自云年三十六，十七入宮，册封者曹內官，時東宮黃氏、西宮李氏。生子玉哥，寇亂不知所。妃於崇禎十四年生子金哥，嚙臂爲記，今在寧家莊。良佐妻拜如見后儀，其杰具儀從送至南京。妃愈驕，所經郡邑，有司供怠，輒詬厲，掀案於地。間有望塵道左者，啟簾露半面，大言曰：「免。」聞者駭笑。至京，上大怒，不見，訶爲妖婦，下錦衣獄。自書入宮月日、相離情事甚悉，且云：「今已失身，何敢復偶至尊？但願一覲天顏，訴明衷曲，死無所憾。」馮可宗以聞，上擲不視，命嚴刑拷之。可宗辭，改命屈尚忠，竟其獄。始供本周王妃，誤傳周王踐阼，故來耳。號呼咒詈，宛轉不三日死。上遷怒於潛夫、爾壘及中軍孫秀，並逮治。良佐疏言上爲羣臣所欺，將使天倫絕滅。諭曰：「朕元妃黃氏，繼妃李氏，追封皇后，詔示海內。卿爲大臣，豈不聞知？童氏不知何處妖婦，詐冒朕妃！朕初爲郡王，有何東西二妃？據供是邵陵王宮人，尚未悉真僞。朕於夫妻之間，豈無天性？況宮媵相從患難者頗多。朕夫妻之情，又豈羣臣所能欺蔽？但宮闈風化所關，豈容闖入？」更封黃后弟伯，以示意。究亦莫識怒妃之繇也。

金妃，雒陽人。鄒太后侍女，姿容端麗。上即位後入宮，從狩蕪湖。

陳、汪二妃，不知何許人。本淮揚妓。上初幸淮上，納之。及即位，又選淑女黃、郭入

宮。及蒙塵，二妃從之。清日給醇酒二十斤，餼核二十品，以竹筒納上臂，二妃進食，然酒餼皆爲清兵所掠，僅空器而已。後不知所終。

又宮嬪某，本選侍。南京亡，執至清江，會病棄去，隨中官徐小九至蘇州，爲尼淡齋庵，名真修。時爲人言南京北來太子事。

張宮人，江都人。弘光初入宮。南京亡，被執。過崇德，題詩壁上，投水死。王宮人，南京亡，流落爲尼。葉子眉，江都人。南京亡被執，經靈壁虞姬墓，題詩。宮人徐淑秀，南京亡後，嫁泰州邵甲，自號昭陽遺子。詩抑塞哀憤，讀者多爲泣下。

紹宗孝毅曾皇后，南昌人。崇禎五年，紹宗襲封唐王，后年十九，冊爲王妃。頗知書禮，任內政，上甚重之。九年秋，京師戒嚴，上以擅發護軍勤王得罪，廢爲庶人，安置鳳陽高牆。遇益艱苦，以土作枕，草薦爲褥，無怨言。早晚勸上母憂，自有昭雪之日。上病頻殆，后恐醫藥有詐，不與飲，入夜默禱於天，剗股進之。事聞，威宗旌其賢孝。后又上疏爲上頌冤，謂：「鄭藩謀爲不軌，尚蒙寬宥，復爵加祿。氏夫爲父復仇，預奏於五年之前；出城未離於封域之內。孰輕孰重，較論易明。革發四年，身經九殞，議貴議親，會典具載。」以是上德后而且憚之。弘光時，以赦徙平樂，抵浙而南京亡，后勸上爲嗣統計。及即位，於隆武元

年八月十三日冊爲皇后；封后父文彥吉水伯，母何氏伯夫人。上性儉，宮中屏金玉錦繡，器用瓷錫，幃幕衾裯率大布爲之。懿旨選女櫛十人，上以爲擾民，不許。后既素能理事，凡批閱章奏，多所參駁。每臨朝，則垂簾座後，以共聽斷。張肯堂疏言垂簾非聖世所宜，后大恚，肯堂以是見疏。是年十二月，上親征，繇水道進，后從幸。密言鄭芝龍不可恃，請就何騰蛟。芝龍阻之，不果，移駐延平。二年六月，后生皇子琳源。八月，清兵度仙霞嶺。二十四日，上自順昌出狩，命后先發，輿出河干，顧從臣曰：「劉官人有任，好護持就道。」詞旨慷慨。清兵追，妃媵狂奔，有一舸數人、一騎三人者。二十七日，如汀州。翌日味爽，周之藩朝行在，聞上與后角口聲。俄十餘騎突入行宮，遂並蒙塵。行至九龍潭，后赴水崩。司禮監王至道、尚衣監鄧金等拒敵，從死者十餘人。或曰，后與上崩於汀州府堂。又曰，上至邵武，知事不可爲，有二宮人縊死，取三棺釘之，其一則后也。昭宗立，遙上尊號曰思文皇后；已追諡曰孝毅貞烈慈肅賢明承天昌聖襄皇后。

宮嬪某，於汀州之變，以身翼上，奮力掣救，受亂刃死，暴屍旬日如生。

文彥，諸生，先卒。

昭宗孝剛王皇后，吳縣人。性閑靜。昭宗封永明王，冊爲妃。侍兩宮能盡敬禮，總持內



政，以才德著賢聲。隆武二年十一月，上即位，册立爲后；封父畧長洲伯，兄維恭華亭伯。永曆元年，隨幸奉天。劉承胤畔，馬吉翔奉太后及后斬關，夜繇水道馳入蠻境。后妹與所生母同輿出城，迷失無蹤。會天淫雨，宮女、內豎皆踉蹌泥淖中，飢餓無人色，而后則夷然也。二年春，幸南寧。閏三月，生皇子慈煊。初，清兵畧桂林，后嘗發內帑餉軍，不足則濟以簪珥之屬。瞿式耜妻邵亦出金珠爲助，時謂中宮之賢，有以化之。及幸安龍，土鏗蘆簾，幾不避風雨，浣衣粗食，倍歷有生之厄。后勤苦自持，日夜讀本章，不以爲疲。舉動行君臣禮，晨必朝，雖在亂離，猶自承平儀注。密敕之獄，龐天壽等直入宮門，執內官張福祿、全爲國坤寧宮外，后稍問之，獄具。馬吉翔益思所以媚孫可望，以爲事涉內官，后必知情，宜廢之以杜後禍，令其黨蕭尹具疏密陳古來后妃不道諸廢立事。后乃泣愬上曰：「不虞漢家末世之風，見今日耶！」上留中寢之。既入緬甸，輒以病自哀。咒水禍作，每聞諸臣眷屬之自盡者，泣謂嬪侍曰：「吾非不能爲此，顧以太后在，恐重傷上心耳！」尋爲清兵所劫。先，后母於十三年正月卒，葬永昌近郊。十六年正月，后次永昌，欲謁墓不克，命鄧凱與王維恭妻代行。后知大體，上於途次帳中，狎宮人李貴芳。后曰：「此何時，而尚如是！」上崩，久出未返，左右詐言他事，須翌日歸。后曰：「吾知之矣，夫復何言！」遂長號不食求死。公主年甫數歲，長跪后前，哭求進湯。數日，后不忍視，強起飲一勺，遂不即死。十六年四月二

十八日，與貴芳從太后自滇京北發，哭聲震天，滇人皆爲流涕。后於中途，叩辭太后，扼吭未殊。及至北京，清養贍之。不二年，公主適章京甲。后哭辭太后及上靈，碎磁甌自勒崩，中官楊德澤送其喪。凶問至東都，鄭經上諡曰孝剛敏肅哲慎正和應天順聖匡皇后。

竇妃，蘄水人。民望妹。從幸緬甸，薨。

宮嬪某，自安龍從入緬，與上相失，入白文選軍。端謹持禮，文選甚致敬焉。比文選降清，嬪聞之，急自散髻，以髮結喉死，文選葬之。

劉、楊二貴人，不知何許人，從幸緬甸。咒水禍作，自經死。

畧，崇禎中官廣東知府。李成棟反正，扈駕肇慶，廣蓄歌童，文武日宴飲其家，尋卒。

王維恭，字洞玉。奉天之難，與弟維讓、吉翔、張同敞、吳雙、吳其靄、洪士彭責承胤母開城門，駕遂得出。金堡之獄，泣陳后不可殺諫臣，堡得改戍。永曆五年十月，晉侯，掌前軍都督府。從幸者梗，與內官楊甲爭博，拳毆碎衣冠，爲緬人所輕，亦死咒水之禍。妻妾幼子回滇京。子三歲，爲吳三桂弓弦勒死。維讓，掌後軍都督府。

監國魯王烈妃，不詳其姓氏，魯王爲世子時所納。崇禎十五年，兗州陷，清兵犯之，不從，薨於牆下。紹興監國，追諡。

監國魯王周義妃，濟寧人。魯王襲封，晉元妃。北京陷，王避兵南下，妃時卧病不起。強之，妃泣曰：「王速行，勿以妾故爲王累！」王不忍，妃乃手碎磁盤勒喉而薨。紹興監國，追諡。

監國魯王張妃，滋陽人。早歲入宮。紹興監國，册爲妃，生世子弘甲。

父國俊，典禁兵，攬權納賄。福京詔至，力主不開讀。嘗入杭間，以爲清且就款，廷臣叵惑之。又受謝三寶萬金，魯王必致樞要而後已。妃聞之，脫簪待罪，王慰之，乃免。及江上師潰，命妃戚毛有倫扈世子，宮嬪自蛟關出，期會於舟山，適畔將張國柱來犯，劫之北去，中途自剄薨。宮嬪周氏等十三人從死。有倫以軍降清，國俊封會稽伯。

毛有倫，餘姚人。天啟初，以副總兵協守燕，建二路，調天津。崇禎末，防倭寧波。後移江上，歷左都督總兵，挂靖夷將軍印，封保定伯。

監國魯王陳貞妃，鄞縣人。隆武二年春入宮。張妃被劫，時妃在副舟中，急令舟人鼓棹突前，追兵不及，伏荒島數日，飄泊至舟山，而王已入閩，旁皇無所歸。張肯堂遣官護之，得達長垣。王見之流涕，始進册爲元妃。在海上者三年，風帆浪楫，莫副山河之容。永曆

三年八月，生子弘棟。十月，復入舟山。先是，張國俊用事，妃嘆曰：「是何國家，是何勳戚，而尚欲爾耶！」至是，親族有至者，悉遣之。嘗遣使中土，寄書訊其女兄，歷叙蛟關之掠、長垣之困、琅琦之潰、健跳之圍，操尺組而待命者，不知凡幾；鬼火以當庭燎，黃蘗以充葛藟，猿鳴龍嘯以擬晨雞，苟延餘息，終擬一死，以完皎然之軀。五年，清兵三道入海，王謂蛟關未能猝渡，親帥師出搗吳瀟。阮進敗死，兵臨城下，劉世勳議分兵送官嬪出，然後背城一戰。妃傳諭辭曰：「將軍意良厚，然螭灘鯨背之間，懼爲奸人所賣，則張妃之續也，願得死此淨土。」諸臣乃止。城陷，妃整簪服，北向拜謝，與貴嬪張氏投井薨，宮眷從者十二人。指揮王相、內官監太監劉朝共掌宮事，嘆曰：「真國母也！豈可使其遺骸爲虜所窺。」相與昇巨石填之，即同刎其旁。事聞，贈諡。

郡主某，舟山亡後爲尼餘姚，名維極。某尚南安鄭哲飛。哲飛逝，扶姑挈子女依王，後依寧靖王術桂東寧。五妃之殉，郡主欲從，術桂曰：「姑老子幼，汝何可死？」郡主涕泣奉姑移居，忍饑盡養，年八十餘卒。

贊曰：易家人之卦曰：「夫夫婦婦，而家道正，正家而天下定。」太祖撫有函夏，首頒女戒。二百七十八年間，宮闈肅穆，蘭殿璇宮，無龍鰲燕啄之妖，斃犬懸龜之禍。北京之變，

孝哀、孝節，下及孀媛，湛身殉國。馴至南渡，彈丸蝸角，流離瑣尾之中，死君死社，皆有古烈丈夫風。家法之嚴，陰教之正，洵足法百王、光前史。笄珈大節，謂非太祖之遺謨遠歟？美矣夫！

# 南明史卷二十六

## 列傳第二一

無錫錢海岳撰

孝皇帝 恪貞鄭皇后 孝誠姚皇后 鄒存義 裕皇帝 張皇后等 光華陳妃等 陳純 端皇帝

孝欽呂皇后 孝正王皇后 昭聖馬皇后 安化公主 廣德公主 王國璽 馬九爵等 姜佐周 悼皇帝

定哀王慈炯 永悼王慈炤 長平公主 光宗李康妃 溫定傅懿妃 曹靜炤 熹宗任宛妃 威宗袁淑妃等

妙音等 榮昌大長公主 寧德長公主

孝皇帝常洵，神宗三子，萬曆十四年正月五日生。初，孝端王皇后無子，孝靖王皇后生長子，是謂光宗。常洵次之，母恭恪鄭皇貴妃，最幸。神宗久不立太子，中外疑妃謀立己子。廷臣交章言其事，竄逐相踵，而言者不止；神宗深厭苦之。二十九年，始立光宗爲太子，并封常洵福王，婚費至三十萬，營雒陽王邸至二十八萬，十倍恒制。廷臣請常洵之藩者

數十百奏，不報。至四十二年始就藩。出官門，召進數四，期以三歲一入朝。時海內全盛，凡列朝存帑明珠瓌寶他贏羨億萬計，皆以資之，詔賜莊田四萬頃，以中州爲不足，并取山東、湖廣田益之。又請籍沒張居正產及揚州至太平沿江荻洲雜稅與四川鹽井榷茶銀自益；又請淮鹽千三百引，設肆雒陽，與民爲市。一日數請，朝上夕報可。終萬曆世及崇禎間，日惟閉門醇酒婦人爲樂。

李自成兵起，河南旱蝗，人相食。民間籍籍，謂先帝耗天下以肥王，雒陽富於大內。援兵過者，喧言：「王府金錢百萬，而令吾輩枵腹死寇乎？」在籍尚書呂維祺聞之懼，以利害告，不爲意。

十四年正月，自成兵大至，攻城，始出千金募勇拒守，自成少卻。夜半，總兵王紹禹開門納自成，城遂破。常洵縋城出，匿迎恩寺，自成跡得之。維祺曰：「名義至重，毋自辱。」內官崔升甫十三歲，勸寧死勿屈。自成殺維祺，常洵跌坐，逼之不語，已而大罵。自成進繩請自裁，常洵叱曰：「任汝殺我！」遂共縊殺之。兩承奉伏屍哭，捽去之。承奉曰：「王死不願獨生，乞棺收骨，齋粉無恨。」自成義許之。桐棺一寸，載以斷車。事畢，二人於旁自經死。選侍孟、蕭、李及執事劉顯典、錢福、李彰雲、焦如星、張鳴皋、杜一經等四十七人亦同死。火宮三日不絕。惟鄒妃、安宗得免。事聞，震悼，輟朝三日，諡曰恭，詔磔紹禹，命河南

有司改殯。安宗即位，追尊諡曰貞純肅哲聖敬仁毅恭皇帝，後改曰孝皇帝，陵曰熙陵，建特廟南京。昭宗即位，加上尊諡曰恭宗慕天敷道貞純肅哲修文顯武聖敬仁毅孝皇帝。

鄒后，順天人。萬曆三十一年十二月十三日冊爲王妃。雒陽破，走孟津、孟縣，逢安宗，至懷慶。懷慶破，匿書堂官黃奎家。安宗立，遙上尊號曰恪貞仁壽皇太后，命典仗李希柎、書堂官孫拱極見，后弟東城兵馬司指揮帶俸侍衛千戶存義，隱諭上即位，繼命常應俊、舍人閻守平來謁。崇禎十七年七月，后自清化經修武，獲嘉，至郭家寨常守義家，書堂官康永寧及張成福來迎。八月十三日，駕至南京，自儀鳳門入。上跪迎洪武門外，相對泣下。尋命湯國祚告於南郊，修西宮之西園第一所爲慈禧殿。移宮之日，命婦入賀，並封存義大興伯，又諭工部以萬金充賞。清兵逼，馬士英以黔兵四百人奉幸浙，逕廣德、安吉至杭州。張秉貞備法駕，以總兵署爲行宮。后赭服，一紫衣宮女侍，召潞王常澆，泣命監國，不應。劉宗周、熊汝霖入見，面糾士英；黃道周復疏請誅之，后歔歔無一語。尋常澆迎入府。北行渡淮，乘間投水不克，依黃調鼎雒陽。崩，合葬熙陵。

姚后，大興人。初爲王次妃，生安宗，早世。安宗即位，追尊諡曰孝誠端惠慈順貞穆符天篤聖皇太后。

存義於南京亡後降清。



裕皇帝器盛，其先唐定王桎，太祖二十二子，洪武二十四年封，永樂六年之國南陽。傳靖王瓊煜、憲王瓊烜、莊王芝址、成王彌錡。彌錡無嗣，以文城恭靖王彌鉗長子宇溫字思誠入繼爲敬王，追封彌鉗爲恭王。宇溫繼統三十餘年薨，年七十一，妃趙、丁。傳順王宙沐，妃周、夏。再傳端王碩燠，世好稽古，樂善有賢聲，妃魏。器盛以萬曆二十二年封世子，妃張、毛，生紹宗。碩燠惑於嬖妾，欲立其愛子，囚器盛承奉司，旋爲弟毒死。碩燠諱之，將傳國次子。守道陳奇瑜、知府王之柱曰：「世子薨逝不明，又不立其子，事且露，奈何？」碩燠懼，請立紹宗爲嗣，追贈諡器盛裕王。崇禎五年，碩燠薨。自宇溫以下四世，皆葬南陽紫山。紹宗安置高牆，改以聿鏞嗣。十四年，南陽陷，遇害。紹宗即位，追尊諡敬、順、端、裕四世爲皇帝，妃趙、周、魏、張、毛爲皇后。毛皇后早世。

光華陳妃，隆武初尊爲太妃。汀州之變，與沈太嬪及太妃母蔣、兄純夫婦死難，百姓葬之羅漢嶺，勒碑以識。或曰，紹宗陳妃出。太嬪，金華人。純，寧洋人，官中書舍人。

端皇帝常瀛，神宗七子。母恭順莊端靖皇貴妃李氏，薨葬昌平銀泉山。昭宗即位，追尊諡曰孝敬恭順榮莊瑞靖敬天光聖太皇太后。常瀛，萬曆二十五年三月十日生，二十九年十月封桂王，天啟七年之藩衡州。垂頤豐背，日角修耳，貌似神宗。性敦厚慈易，爲諸王